

全
華
叢
書

全華叢書

青村遺橐兩卷附錄一卷

金華叢書

退補空閑

序

詩以言志者也志趣不高其詩必
墮凡近詩又本性情者也性情不冲
澹蕭散其詩必多矜氣少坦懷故
觀其志之所存與其性情之所發而
其詩可知即其人之品亦因以定吾

郡金德原先生生值元季師友皆
極一時之選甚有時譽矣而少無宦
情遁跡邱園雖見知於冀學士柳待
制交相推薦皆辭不就逮入明初復
堅拒州郡辟命教授鄉里以終余高
先生之為人求其遺集頻年不獲今

率七月得孫琴西方伯遜學齋所藏
抄本忻喜無量伏而讀之其詩模範
山水陶冶性靈亭々物表矯々霞外
非夫志趣超曠性情閒適有得於中
無營於外者烏能詣此四庫書目
稱其品格在江湖詩以上亮哉爰亟

繡梓以永其傳遜學齋本從其初姓
題曰劉涓撰今仍依書目著錄易劉
為金云光緒二年丙子冬十月郡後
學胡鳳丹月樵甫識於鄂垣之退補
齋



青村遺稿序

青村翁生勝國之末當高皇帝龍飛江左其同學宋文憲王忠文輩皆以才望聯翩並進爲開國羽儀翁獨夷然不屑屢違徵辟高卧烟霞絕無貢禹彈冠之慕蓋所謂確乎不拔者非耶惜其著述散佚僅得遺詩什一於千百之餘氣清深而格醕正使讀之者挹其流芬猶足廉貪夫立懦志信真儒之作不徒矜聲律於風雲月露間也嗟乎士君子立身貴特立耳意有所不可則雖加以邦有道貧且賤焉之恥而不顧彼奔走富貴借口於

聖人之一說以自便其私者甯不賴有餘泚哉是集行則天下咸識先民矩度于今日營競場中下一帖清涼飲子不獨有功於翁抑可謂有功於名教矣堡幸託族屬仰止高風奉以周旋庶幾不敢爲苟且功名之事所賴裨益良多而吾宗羣從學有淵源無貽失墜以光大先人德業者尤願交相勗焉若徒借以資筆墨供吟嘯而已則失之遠矣崇禎癸未九秋賜進士出身前知臨清州事武陵族子堡頓首謹敘

青村先生小傳

浦汪鄭 栢

金涓字德原義烏人受經於許謙學文於黃潛淹貫經傳卓識過人隱居青村學者稱爲青村先生州郡薦辟輒懇辭謝曰犧尊青黃豈木所願耶吾髮已種種焉能驅馳簪組之間哉日游詠乎山水以終其身贊曰栢觀朱太史記青村隱居稱涓爲安貞肥遯之士考其德而求其行信足有徵焉

右見金華賢達傳

青林先生小傳

附五服

祭青村先生文

嗚呼先生生於皇明盛世家道昌隆旣富且庶當其伯仲一掌於金穀唯先生向學乃專心而致志歲寒亭上立雪已深白雲軒外春風和氣斯時同門者百數十人獨先生稱爲入室高弟先生自少有志於濟貧恤孤遠邇饑寒賴先生而活者不可數計先生之配雙失其明眾勸再聘而先生酷以前定而心不少二此皆先生大異於世人而世人莫能窺先生之涯際先生自爲童子時出語長老悉已驚悸旣長學乎六經其文章簡古而

純粹毅然不仕隱於青村以避名勢借使用之於朝廷
必作爲雅頌歌咏皇明之功義薦之清廟必上追商周
魯頌之隆治奈何終不出而立後學之標幟先生之子
若孫亦嘗爲顯官而先生弗克享其祿而傾逝可宗蚤
歲亦執經而造講席賴先生口授聖賢之遺意今者宦
轍四方職乃充於卑位先生沒甘有餘載未嘗不感時
懷思而汪然殞涕尙饗門人王可宗

青村遺稿後序

金別駕儒元先生忘其年而交於予於茲餘二十年矣
嘗謂予曰吾與子通家之好也吾先世青村先生從子
先世文獻公遊最久惜乎其所爲詩文多散落吾於先
世舊隱處及舊交遊家搜訪僅得一二言之若戚然有
遺憾焉者因出示予予讀之見其俊拔而清和淵深而
嚴愼宛然先世家法也相與慨嘆久之後數年爲正德
辛巳予應貢上京恭遇今上皇帝入繼大統萬幾暇廷
賜試事竣分南北人入監予轉而別駕公之子孔殷已

在監半載矣出入與之俱及撥厯冬官部事又同焉相與甚洽予亦不知吾年之長於孔殷也一旦謂予曰吾先世所遺詩文若干篇首恨不多將梓之以壽其傳可乎予曰可奚有於是譬之玉焉所積嘗累積矣歲久淪逸存者不一二得之亦足爲寶況可因此以知其他玉之皆良奚有於是孔殷於是繕寫成帙請予文以序予先世薨時襄後事哀集遺文爲之請於官以建祠宇而紀之青村先生輒與焉則其生事吾先世可知矣此予所願欲酬焉而未能者也今其後世以文來請予惡忍

辭予惟斯稿之散之藏之晦百數十年後卒有賴於別
駕父子而聚而傳而顯是固有時而別駕父子之賢亦
不可掩矣使別駕父子之後代有別駕父子者出則斯
稿之傳甯有窮乎抑予於斯有感焉予與別駕父子之
先世爲師生而予又與別駕父子爲今日之交予之後
亦有能於斯帙之後綴一辭以不忘其所謂通家之好
者耶
嘉靖三年七月同里黃端寓留都序